

NLP: Bantu mantapkan diri, organisasi

02.03.2012 6

KOTA KINABALU: Lebih 20 orang menyertai Bengkel Pemantapan¹ pengurusan organisasi dan pembangunan diri melalui kaedah *N e u r o - L i n g u i s t i c* Programming (NLP) di Jabatan Hal Ehwal Pelajar di Universiti Malaysia Sabah (UMS), baru-baru ini.

Program anjuran bahagian Perumahan dan Kebajikan Pelajar (BPKP) universiti itu disertai oleh pegawai dan kakitangan BPKP dari kampus induk dan Kampus Antarabangsa Labuan (UMS-KAL).

Pengerusi Penganjurnya, Masri Judah berkata bengkel itu bertujuan untuk mengintegrasikan aplikasi NLP dan hypnotherapy dalam latihan dan komunikasi umum bagi mendapatkan keberkesanan yang tinggi khususnya di kalangan kakitangan BPKP.

“Program ini mampu menambahbaik kecemerlangan diri pegawai dan kakitangan bagi membentuk cara berfikir yang positif sekaligus memperolehi kejayaan, memiliki keyakinan tinggi, harga diri dan semangat kekeluargaan serta mampu memantapkan organisasi khususnya di HEP pada masa akan datang.”

Sementara itu, Ketua Jabatan HEP, Darwis Awang berkata NLP memainkan peranan penting bagaimana minda beroperasi dan kemudiannya mempengaruhi tingkah laku dan prestasi seseorang.

“Aktiviti seperti ini amat berguna sekali dan memberi input terbaik kepada para peserta untuk menjadi seorang kakitangan yang berkeyakinan tinggi, mampu mengatasi sikap negatif yang menghalang perkembangan diri peserta, dapat mengenali diri dan orang sekeliling dalam membentuk hubungan erat dan harmoni sesama individu, keluarga dan rakan sekerja,” katanya.